

SULIT

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KETIGA BELAS**

PERTANYAAN : LISAN

**DARIPADA : TAN SRI DATUK SERI PANGLIMA HAJI
ANNUAR BIN MUSA
[KETEREH – BN]**

TARIKH : 26 JULAI 2017 (RABU)

SOALAN NO. 44

Minta **MENTERI BELIA DAN SUKAN** menyatakan adakah Kerajaan bercadang untuk menyerahkan pelaksanaan Pelan Pembangunan Bola Sepak Negara (PPBN) kepada FAM dan apakah pencapaian pelan berkenaan setakat ini.

SULIT**JAWAPAN**

Yang di-Pertua,

1. Untuk makluman Ahli Yang Berhormat, **Program Pembangunan Bola Sepak Negara (PPBN)** telah dilancarkan oleh YAB Perdana Menteri pada 10 April 2014 dan ia telah diangkat statusnya sebagai Projek Nasional bagi menjamin komitmen jangka panjang kerajaan. PPBN mempunyai 3 pemegang taruh utama iaitu Kementerian Belia dan Sukan (KBS), Kementerian Pendidikan Malaysia (KPM) dan Persatuan Bola Sepak Malaysia (FAM). Keputusan yang melibatkan dasar dan memerlukan tindakan pelbagai agensi akan dibincang di peringkat Jawatankuasa Pembangunan Bola Sepak Negara yang diwakili juga oleh KPM dan FAM serta dipengerusikan oleh Menteri Belia dan Sukan.

2. Manakala, di peringkat pengurusan program, wakil PPBN juga berada di dalam Jawatankuasa Teknikal dan Pembangunan Belia FAM bagi memutuskan perkara-perkara teknikal bola sepak dan urusan pasukan remaja kebangsaan. PPBN sentiasa memberikan laporan status kepada FAM supaya inisiatif pembangunan bola sepak di Malaysia selari dengan keperluan FAM sebagai '*governing body*'. Di peringkat negeri pula, PPBN bekerjasama dengan Persatuan Bola Sepak Negeri dan kelab-kelab yang juga ahli gabungan FAM. Kaedah kerjasama di peringkat kebangsaan dan negeri yang digunakan setakat ini adalah efektif dan menepati matlamat PPBN

SULIT

maka tiada perancangan untuk mengubah mekanisma perlaksanaan tersebut.

3. Semenjak daripada pelancaran PPBN pada April 2014 sehingga kini, PPBN telah melatih hampir 23 ribu orang pelatih terbaik di seluruh negara di peringkat umur 7 sehingga 17 tahun. Kita juga mempunyai piramid pembangunan yang lengkap bagi menyalurkan di antara 1,000 ke 1,500 orang pemain yang berpotensi mengikat kontrak dengan kelab-kelab profesional dalam dan luar negara setiap tahun.
4. PPBN kini mempunyai lebih 1,000 orang jurulatih sepenuh dan separuh masa di seluruh Negara dan menjalankan sirkit-sirkit Liga Remaja di setiap peringkat umur bermula dari 7 hingga 17 tahun. Dengan adanya pertandingan sepanjang tahun, maka pengenalpastian bakat dapat dijalankan dengan teratur bagi mengenalpasti bakat-bakat remaja terbaik negara untuk ditawarkan sebagai pelatih elit di Akademi Bola Sepak Negara Mokhtar Dahari (AMD) Gambang, Pahang.
5. Pelatih-pelatih elit AMD pula diberi pendedahan latihan dan pertandingan di luar negara setiap tahun bagi meningkatkan prestasi dan keyakinan mereka apabila bersaing dengan yang pemain-pemain terbaik dunia. Dalam masa yang sama, pelatih-pelatih elit ini akan sentiasa berada dalam radar akademi-akademi utama dunia setiap tahun.
6. Sehingga kini, seramai 15 orang pelatih AMD berumur 14 dan 15 tahun telah mendapat tawaran dari kelab-kelab seperti Benfica, West

SULIT

Ham United, Lyon, Feyenoord, AZ Alkmaar, Tottenham Hotspur dan beberapa kelab-kelab Liga Jepun.

Sekian, terima kasih.